

四庫全書

史部

欽定四庫全書

史部

欽定八旗通志卷

二百三至  
二百四

欽定八旗通志卷二百三

人物志八十三

大臣傳六十九

漢軍鑲紅旗一 馬鳴珮 柯汝  
極 金礪 劉武元 李棲鳳

趙國祚 柯永盛 吳萬福 周有德 陳啟泰  
王登聯

馬鳴珮

馬鳴珮漢軍鑲紅旗人先世居山東蓬萊縣有馬

英者仕明為遼東保義副尉因占籍遼陽左衛

國初取遼陽始隸旗籍鳴珮年十七補博士弟子員  
以文學受知

太宗文皇帝召入文館理事天聰三年授工部啟心郎仍  
供事內院崇德元年甄別內三院官為四等鳴珮  
列二等

賜人戶牲畜八年考滿授職雲騎尉順治元年

世祖章皇帝定鼎燕京擢山西冀南道二年調湖廣湖南  
道三年以戶部侍郎銜總督江南糧儲兼理錢法

疏言錢法首嚴私鑄犯者宜盡法究治並請設錢  
法道一員以資統理時江南兵饟不敷又請留關  
權稅課接濟並見施行八年任戶部侍郎十年改  
總督倉場侍郎十一年二月擢宣大總督勸墾宣  
雲兩鎮荒地三千餘頃時平陽草寇嘯聚山谷肆  
出劫掠鳴珮調兵扼要隘乘機捕勦令副將許占  
魁搜擒賊渠張五等二百八十餘人悉斬之復招  
撫餘賊九十餘人下部議叙十月調江南江西總

督偽伯陳其綸竊據瑞金遙附海寇鄭成功結寨  
大柘山鳴珮檄總兵胡有陞等督兵進剿其綸敗  
竄入寧都天心寨為土人擒斬又搜捕偽侯汪龍  
於九江是時成功黨胡寧等猖獗逞亂鳴珮策官  
軍於蕩齒諸涇擊走之未幾故明魯王舊將張名  
振聚船海上屢犯崇明鳴珮劾總兵王燦防剿無  
能請黜罷下部察議部臣以海寇登岸焚掠提督  
張天祿疎防失事鳴珮不據寔入告坐狗庇降二

級留任督勦尋遣舟師問道出海與賊遇奮擊之  
賊潰奔擒偽副將林正禮等獲其船艦軍械先是  
福山等營額兵一千八百名部臣核議裁減鳴珮  
以沿海汎地遼濶狡賊乘虛竊發勢難堵禦請仍  
如原額復周厯松江崇明諸邑親察形勢奏請水  
陸夾勦攻守有脩部臣又以給事中張玉治言江  
寧提督應移駐蘇州吳淞宜增兵防禦令鳴珮核  
議鳴珮以沿海水陸相錯巡防尤不宜懈應令江

寧提督分兵移守劉河福山以衛蘇州至吳淞為  
松江門戶已有蘇松提督駐守無需再議增兵但  
令與江寧提督協籌勦禦勢相犄角則內地可保  
無虞疏入得

旨俞允十二月海賊潛舉再犯泊舟崇明海港中隔小洪  
官軍莫能徑渡鳴珮密令民戶出草束木板運港  
側以濟師焚燬賊船斬獲無算賊乘夜遁十三年  
正月招撫海賊黃卿等一百餘人復降其偽總兵



顧忠僞副將黃忠董禮四月率叅將吳守祖協勦  
海賊於浙江獨山俘獲甚衆粵東賊曾拱震等復  
出沒吉安贛州二郡鳴珮督兵偵勦邀擊賊渠於  
上坪閏五月追勦徽州花橋諸賊敗之旋以目疾  
再疏乞休

命回京調理晉世職三等輕車都尉康熙五年正月病卒  
予祭葬如典禮祀江南名宦子雄鎮別有傳

柯汝極

子永慕

柯汝極遼陽人後隸鑲紅旗漢軍天命六年

太祖高皇帝攻克遼陽有降人叛逃汝極舉發其事復擒

獲間諜十四人授叅領予三等輕車都尉世職

太宗文皇帝天聰八年授禮部叅政崇德二年考滿晉世

職二等輕車都尉三年裁省叅政仍專任叅領七

年分漢軍隸八旗以汝極任佐領順治元年三月

復授禮部叅政二年十月改鑲紅旗漢軍副都統

遇

恩詔晉世職一等輕車都尉四年以副都統率兵駐防杭  
州七年七月卒於官無子以弟之子永綦為子襲  
職永綦旋任兵部郎中兼叅領遇

恩詔晉爵三等男十年擢鑲紅旗漢軍副都統十二年兼  
任戶部侍郎十三年擢本旗都統同寧海大將軍  
伊勒德征浙江海賊由寧波乘舟趨定海偽伯阮  
思偽總兵胡自慶等率衆列艦於衛水洋我師進  
擊賊衆既卻復前永綦躍入賊艦斬自慶餘賊望

風披靡我諸軍並進斬阮思及偽總制陳六御等  
遂定舟山十四年追論在戶部時援

赦免員外郎朱世德虧缺稅銀坐贍徇降世職一等輕車  
都尉尋叙平舟山功仍復三等男康熙元年同靖  
東將軍濟什哈征山東叛賊于七賊糾黨據棲霞  
縣岨嵎山乘夜劫營永綦射殪三十餘人賊竄遁  
復追殪九十五人于七竄入海十年三月授京口  
將軍十二年以擅撥戰艦與總兵李廷棟移取家

口為副都統張所養劾奏罷任十三年起署山東提督十六年十二月文登城守兵以給饗遲延羣集縣廨鼓噪刃傷知縣吳閻啟十七年五月左都御史宋德宜劾永綦平日剋減兵糧縱成驕悍文登兵衆鼓噪又隱匿不報無異養癰待潰

上命吏兵二部察議罷任革世職以其弟永藝襲汝極之一等輕車都尉二十四年卒

金礪

金礪遼東人明武進士仕鎮武堡都司

本朝

太祖高皇帝天命七年大兵征明克廣寧城礪率屬來降

授叅領予三等男爵

太宗文皇帝天聰五年始設六部以礪為兵部承政六年  
上幸演武場閱兵礪與叅領石國柱金玉和高鴻中等並  
以訓練有方

賜鞍馬尋調戶部承政八年考績晉爵二等男崇德二年

隨武英郡王阿濟格征明皮島叅領巴雅爾圖等  
統兵先入敵陣礪與副將高鴻中所部水師停泊  
觀望致前隊失利下法司議罪應褫職論死籍沒  
上以礪與鴻中並有歸順功

命免死四年分漢軍四旗以礪屬鑲紅旗漢軍復任叅領  
五年授吏部叅政六年擢都統七年大兵克松山  
與都統巴顏等奉

敕收藏所獲鎗礮火藥以備用旋克塔山隨鄭親王濟爾

哈朗等駐守其地八年隨鄭親王攻前屯衛中後  
所二城指揮士卒發紅衣礮克之論功予三等輕  
車都尉世職順治元年五月偕副都統李率泰安  
撫天津亂民六月同都統葉臣招撫山西時流賊  
李自成遁入陝西賊黨陳永福竊據太原礪與葉  
臣潛往審視攻圍處所城內步兵突出礪擊敗之  
復督本旗兵以紅衣礮攻克其城凱旋

賜銀四百兩晉世職二等輕車都尉二年隨順承郡王勒



克德渾征湖廣偽總兵馬進忠降而復叛礪同都  
統劉之源擊敗之武昌奪其戰艦六十餘尋奉

詔與副都統佟岱分率左右翼兵同恭順王孔有德征湖  
南時偽伯黃朝宣等附明桂王朱由榔聚衆十餘  
萬屯湖南四年礪與有德水陸並進擊破其兵追  
斬朝宣於衡州復與懷順王耿仲明副都統卓洛  
進兵長沙其總兵楊國棟聚馬步衆七千迎戰礪  
率兵奮擊敗之斬國棟於牛皮灘五年十月凱旋

賜金二十兩銀四百兩六年正月叙功晉世職一等輕車

都尉七月授平南將軍鎮守浙江七年遇

恩詔加一雲騎尉八年明魯王朱以海及其臣阮進張名

振據舟山礪與副都統吳汝玠等率兵由寧波出

定海會總督陳錦兵敗進於橫洋擒斬之遂抵舟

山掘陷其城名振擁以海遁九年海賊鄭森犯漳

州礪奉

命統兵赴福建議勦師至泉州賊聞風退屯江東橋礪由

長泰進營漳州城北分兵萬松關以牽制賊營賊  
糾衆來攻我兵迎擊七戰皆捷斬獲無算漳州圍  
解海澄南靖漳浦諸縣悉平叙功並兩遇

恩詔晉爵至一等男加一雲騎尉十一年授陝西四川總  
督十二年奏請以遵義永寧二鎮兵分屯順慶府  
潼川州川北龍安之兵亦令各擇曠土屯種即有  
寇警不勞運餉而兵食自足又以陝西神道嶺地  
當險要宜於潼關各營撥兵五百分駐附近諸處

以資援勦俱下部議行十三年三月引年乞休

上念其宣力多年勤謹夙著

命加太子太保以原官致仕康熙元年七月卒

賜祭葬如例以其弟俊襲爵

劉武元

子浩孫中柱中樞中樞中樞

劉武元遼東人初為明遊擊守大凌河

太宗文皇帝天聰五年隨明總兵祖大壽來降崇德六年

授刑部叅政七年分漢軍為八旗武元隸鑲紅旗

漢軍順治元年叙投誠功授三等輕車都尉世職  
二年任天津兵備道三年擢南贛巡撫時瑞金石  
城興國等縣土賊嘯聚武元遣副將徐啟仁等討  
平之復分遣副將劉伯祿叅將栗養志遊擊鮑虎  
勦龍南寧都上猶賊衆破蓮花魚骨二寨擒斬偽  
都督葉南芝偽軍門劉志諭偽提督劉飛等五年  
正月江西提督金聲桓偕副將王得仁據南昌叛  
糾黨犯贛州武元堅守累月登陴督戰殺賊萬餘

俘獲無算得仁被創先遁聲桓聞征南大將軍譚  
泰率八旗兵征南昌亦退還武元出奇兵襲其後  
敗之於太湖港時廣東提督李成棟叛於惠州連  
陷郡邑勾連尚蠻土寇號稱百萬於十月朔薄贛  
州武元與總兵胡有陞授計諸將乘賊方鑿濠分  
兵東西南三門出擊合攻賊營賊驚潰自相蹂躪  
成棟僅以數騎走事

聞得

旨嘉獎

賜鞍馬冠服叙功加銜右都御史兼兵部侍郎六年二月  
成棟復糾偽武陟伯閏蝦蟆偽宣平伯董方策等  
屯聚信豐武元偕胡有陞及副都統覺善合剿破  
賊營五成棟濟河宵遁馬蹶墮水死餘賊盡殲四  
月武元遣副將先啟玉剿賊瑞金縣斬偽豐城王  
朱由植及偽監軍李元培等七月進剿梅嶺破賊  
木城擒偽總兵劉治國七年正月武元遣栗養志

協攻南雄府復其城副將高守貴攻克汀州紫雲  
臺寨六月偽軍門彭順慶竊據寧都石城二邑武  
元遣鮑虎克復之八年廣東餘孽羅榮犯贛南武  
元遣裨將楊遇明領兵進勦擒斬羅榮十年正月  
偽鎮遠侯郭達伯勾連閩廣諸賊嘯聚寧都瑞金  
界武元遣遊擊左雲龍馳擊賊兵潰斬獲甚多閏  
六月引疾乞休

命以原官致仕尋叙平廣寇功加太子太保兵部尚書三



遇

恩詔晉世職一等輕車都尉兼一雲騎尉十一年卒年五

十有二

賜祭塋如典禮贈少保謚明靖後追叙軍功晉二等男長  
子瀆襲爵次子浩康熙十三年任廣西潯州府知  
府會逆賊孫延齡叛率偽總兵緄成德以兵薄城  
下圍且急浩與副將蔣秉鑑倉卒備禦晝夜堅守  
以待援兵越五日秉鑑暗通賊啟城內應縛浩獻

賊營逼使降浩罵賊不屈死之其子中柱中樞中  
樞中樞及家屬七十餘俱被害事

聞

賜祭葬贈太僕寺卿雍正三年入祀昭忠祠

李棲鳳

李棲鳳廣寧人隸鑲紅旗漢軍以生員任秘書院  
副理事官崇德元年考察各官棲鳳列二等

賜人戶牲畜順治元年授山東東昌道二年調湖廣上荆

南道三年六月遷湖廣布政使十月擢安徽巡撫  
值休寧婺源二縣土賊吳繼程國柱等聚衆劫掠  
棲鳳檄總兵李仲興副將許漢鼎發兵會剿擒獲  
偽總兵江烏鄭恩祥招降偽總兵張天麒江周等  
十人又土賊趙正犯宿松棲鳳偕總兵卜從善冷  
允登進剿師至涇池斬賊千人擒趙正子趙捷應  
弟趙秀升及偽瑞昌王朱誼貴等俱伏誅會屬邑  
有濫徵租稅者棲鳳不舉劾坐徇縱降三級調用

五年授浙江嘉湖道六年擢廣東巡撫時廣東賊寇俱附明桂王朱由榔連陷郡邑平南王尚可喜靖南王耿繼茂奉

命往征率師駐守省城棲鳳駐南雄策應軍需七年會師攻克韶州府勦平雷州廉州諸賊寨八年偽國公曹志建率衆犯韶州棲鳳飭南韶道林嗣環遊擊張瑋擊却之斬賊二千餘九年遣副將先啟玉陣擒叛鎮李成棟子李元允於欽州十年李定國兵

由廣西梧州突犯肇慶棲鳳調廉州兵馳援敗之  
於龍頂岡尋令總兵徐成功吳進功分兵恢復羅  
定州東安縣又遣副將陳武李之珍勦賊於高州  
府至沙江賊沿河列寨我兵渡河衝擊擒獲偽副  
將姚奇偽中軍余元璣等旋率兵抵化州吳川焚  
毀賊巢殲馘無算叙功加兵部右侍郎十一年甄  
別直省督撫加棲鳳一級十五年三月考滿加兵  
部尚書六月擢兩廣總督時朱由榔竄雲南其將

陳奇策與其江夏王朱蘊鑰德陽王朱儼錦盤踞  
上思州旁掠屬邑棲鳳檄總兵粟養志率兵進勦  
陣擒奇策蘊鑰儼錦又勦撫那綿板強諸寨太平  
思恩等府皆平十七年加太子少保先是御史李  
之芳劾棲鳳濫委廢員郭光祖署左江道等事

詔棲鳳回奏棲鳳自引咎部議應罰俸援

赦寬免十八年九月分設廣西廣東總督棲鳳改廣東十  
二月以年老致仕康熙三年正月卒

賜祭塋如例祀廣東名宦祠

趙國祚

子珙

趙國祚漢軍鑲紅旗人父一鶴

太祖高皇帝時來歸

太宗文皇帝天聰八年追叙各官投誠功予三等輕車都

尉世職尋卒國祚兄國正承襲崇德四年國祚管

佐領事率漢軍屯田義州八年三月同護軍統領

阿爾津等征黑龍江師還

賜貂皮白金九月隨鄭親王濟爾哈朗征明取前屯衛中  
後所二城順治元年叙功予雲騎尉世職尋管叅  
領事隨豫親王多鐸南征攻克揚州府及嘉興府  
江陰縣叙功晉世職騎都尉八年授戶部理事官  
由叅領擢鑲紅旗漢軍副都統尋遷都統屢遇

恩詔晉世職至二等輕車都尉十二年九月調鑲白旗漢  
軍都統十二月授平南將軍駐防浙江十五年任  
浙江總督十六年二月海賊鄭成功犯溫州國祚



以督兵擊敗獲船九十疏報復言遣兵分勦永嘉  
泰順青田諸土賊斬獲甚衆尋又疏報鄭逆率衆  
十餘萬水陸分踞盤石及樂清之沙園蒲岐官兵  
奮勇往勦賊乘船數千泛海遁城池全復行間勞  
績應察明請叙得

旨覽所奏各官塘報賊船自遁止留空城並無對敵實跡  
趙國祚輒稱城治全復希功請叙殊不合理下部察議  
降三級留任五月疏報鄭逆率馬步賊兵由定關

直逼寧波府城副都統夏景梅水師總兵常進功  
等率兵轉戰大捷賊船遠遁請

勅部叙功得

旨凡管兵各官報捷必臨陣斬獲若干所獲馬匹器械若  
干攻克城池營寨若干確實有據始可言功若泛言斬  
獲或城池失守賊去即稱恢復皆係飾詞鋪張深為可  
惡常見明末行間奏報輒云殺死無數獲器械無算掩  
敗為功相為欺罔以致誤國今乃仍踵陋習每多希功

請叙倘沿習不改必致貽誤封疆著通行嚴飭以後再  
有此等奏報者定治以罔上冒功之罪不貸是月鄭成  
功寇江南旋陷鎮江犯江寧大兵禦擊月餘賊乃  
敗遁於是部議江浙管兵大員玩寇罪並追論國  
祚任駐防及任總督先後被賊陷平陽瑞安樂清  
太平等縣城防禦多疎應革任

詔從寬罰俸一年戴罪圖功自贖十八年六月奏請以台  
州温州寧波之道府廳及臨海永嘉鄞縣官並照

邊俸例陞轉從之九月調山東總督十月調山西  
康熙元年甄別直省督撫國祚以過多功少解任  
十三年逆藩吳三桂反國祚請出征効力起為江  
西提督駐九江尋以賊犯江西

上命副都統根特率南昌駐防兵赴袁州國祚率兵移駐  
南昌時逆藩耿精忠叛應吳三桂遣賊黨犯江西  
陷廣信撫州建昌國祚同定南將軍希爾根平寇  
將軍哈爾哈齊率兵征勦偽都督易明自建昌率

賊萬餘迎戰大兵分道擊敗追勦七十餘里遂復  
撫州國祚同哈爾哈齊駐守易明復糾賊萬餘來  
犯國祚同前鋒統領沙納哈署護軍統領瓦岱奮  
擊之殲賊四千有奇十四年大將軍安親王岳樂  
以國祚久歷行間熟悉軍務疏請隨征

上允之十五年進兵長沙吳逆合衆來犯國祚擊卻之尋  
以茶陵新復亟需重兵

詔國祚移兵駐茶陵安親王疏言長沙要地賊鋒難遏國

祚未可遽離遂仍留駐守十八年長沙賊平隨安  
親王赴寶慶敗賊於紫陽河賊將吳國貴據武岡  
聞大兵至率衆二萬餘扼雙井堡隘口拒戰國祚  
同建義將軍林興珠大敗之國貴中礮死餘衆宵  
遁追至武岡州賊棄城遠竄國祚尋以創發乞休

允還京致仕二十七年九月卒年八十

賜祭塋如典禮謚敏壯子玙襲職三十四年由廣東駐防

協領授鑲紅旗漢軍副都統三十五年

上親征噶爾丹

命珣率本旗火器營以從三十八年任京口右翼副都統  
四十四年擢正紅旗漢軍都統四十七年二月卒  
賜祭葬如例珣所襲父職部議減去

恩詔晉加者改為騎都尉以珣之子世昂襲  
上念趙國祚當征勦吳逆時著有勞績

命仍襲二等輕車都尉

柯永盛 弟永昇

柯永盛遼陽人隸鑲紅旗漢軍副都統柯汝極從子也

太宗文皇帝崇德六年任佐領隨大軍圍錦州以礮攻克涼馬山臺及杏山塔山城七年奉

命同副都統馬光輝鑄神威礮八年隨鄭親王濟爾哈朗  
征明取前屯衛中後所二城叙功予騎都尉世職  
順治元年任刑部理事官大軍初定山東授膠州  
總兵至則勦平昌樂土賊秦尚行趙慎寬等流賊



李自成裨將趙應元詭就侍郎王鰲永招撫入青州害鰲永據城猖獗永盛率兵赴援同副都統和托李率泰駐兵城外輕騎入城以計擒應元斬之復率兵圍高密擒斬偽元帥張輿二年濰縣土賊張廣既降復叛糾衆數千犯萊州永盛遣遊擊楊遇明擊敗其衆廣中鏃死餘賊悉平三年調江寧總兵總督洪承疇遣永盛領兵會勦江西叛賊南贛巡撫苗胙上奏言江西諸郡叛服靡常贛州為

全省要區請留永盛鎮守

詔調永盛南贛總兵四年正月湖廣興國州土賊柯抱冲  
陳珩玉等殺武昌同知張夢白寇掠江西武寧永  
盛遣將分勦連破賊砦抱冲珩玉並就擒時明桂  
王朱由榔據湖南石城寧都雩都瑞金長寧安遠  
諸邑叛應之倚山結寨四出劫掠永盛遣副將劉  
伯祿徐啟仁叅將董大用遊擊孔國治等次第勦  
平之八月擢湖廣提督五年江西總兵金聲桓叛

興國孝感雲夢黃安麻城蘄州諸土賊亦皆蠢動  
永盛移兵防守要地分遣叅將鄔乘鸞遊擊張國  
忠等搜勦賊寨以時奏捷十年李定國兵掠湖南  
寧遠大將軍貝勒屯齊統師由衡州進征永盛督  
兵繼其後策應援勦屢敗賊衆遇

恩詔晉世職三等輕車都尉十八年調山西提督康熙三  
年考滿加左都督七年永盛以年老乞休

上慰留之尋以宣力年久加太子少保八年致仕十四年

正月卒

賜祭葬如例子鍵襲世職弟永昇由廕生用至員外郎康熙十三年隨征逆藩吳三桂至湖廣辦理糧務有功即軍前授為湖南糧儲道十九年遷江西按察使二十二年遷安徽布政使二十七年二月擢湖廣巡撫時裁湖廣總督令督標兵老弱者歸農強壯者候缺食糧五月永昇甫之任裁兵夏逢龍結衆作亂突入巡撫廨署遇拒阻者輒力之傷永昇

臂奪其印復傷永昇足仆地悉驅其親屬及家人  
出走搜掠財物永昇乘間自縊死子鉉由九江走  
安慶以其事訴於巡撫楊素蘊素蘊入奏

賜贈卹祭葬如典禮

世宗憲皇帝時以永昇入祀昭忠祠

吳萬福

吳萬福奉天遼陽人初仕明為守備崇德七年大  
軍圍松山萬福隨副將夏承德來歸隸鑲紅旗漢

軍順治元年從征流賊李自成叙功授騎都尉世職三遇

恩詔加至二等輕車都尉十五年加都督僉事充新設之福建福寧總兵康熙元年六月海賊偽總兵王士鰲偽副將李禮泊船沙埕青嶼山萬福遣使招撫士鰲禮悔悟投誠為偽水師都督阮述陳文達圍阻不得達萬福親督兵夜馳踰嶺殺賊衆千餘援士鰲禮突圍出二年十一月海賊阮春雷以船二

十餘竊據東蚶長腰外島窺福寧明魯王舊將張  
煌言率五十餘船入閩與春雷合適偽鎮林國樑  
統三十餘船來歸機洩煌言合衆圍之國樑斬煌  
言之弟嘉言復以砲碎其船乞援于萬福萬福以  
福寧向無舟師議用國樑之船攻之遣遊擊李應  
先劉成海等水陸夾勦擒斬數百級奪船械毀東  
蚶長腰賊巢春雷煌言俱遠遁事

聞得

旨嘉獎加都督同知三年三月春雷煌言復集百餘艘泊  
三都青山等島萬福約水師總兵李長榮夾勦長  
榮趨東街口萬福統國樑船直抵官井洋箭礮齊  
發斬二百餘級焚其船五賊窘退出東街口長榮  
師適至復進擊賊北潰遂合兵追至大洋陣斬及  
溺死者甚衆獲甲冑旗槍無數復窮搜三都青山  
各澳毀其巢春雷赴泉州降總督李率泰疏請錄  
叙部議長榮加二級萬福加一級



上諭總兵李長榮吳萬福進剿一處賊寇攻戰無甚懸殊  
再加核議尋議各加一級得

旨李長榮加署都督僉事吳萬福加右都督十三年四月  
逆藩耿精忠叛萬福嬰城固守城破死之全家被  
害十九年

詔褒卹殉難諸臣贈萬福左都督太子少保

賜祭葬謚忠愍除所得輕車都尉襲替外復廕子弟一人  
守備三十五年福建巡撫卞永譽請建祠于閩春

秋致祭得

吉俞允雍正二年入祀昭忠祠曾孫瑞麟襲輕車都尉十  
一年與都統趙宏濟會飲革職銷除輕車都尉仍  
留騎都尉世襲因替瑞麟子錕鑑鑑子國澍遞襲  
國澍任廣西慶遠副將萬福次曾孫祥麟襲難蔭  
守備

周有德

周有德漢軍鑲紅旗人順治二年由貢生授宏文

院編修五年十一月大同總兵姜瓖叛有德隨英親王阿濟格往征賊平還京授侍讀康熙元年遷國史院侍讀學士尋擢宏文院學士二年授山東巡撫疏言厯城縣有明李廢藩地畝應如齊河等縣例照民田科賦不宜仍明時租額徵收事下部議行三年六月以獲解逃人加工部侍郎銜明年疏請復孤貧口糧舊額請寬青菜登諸處居民海禁仍聽其捕魚資生又言德州駐防兵丁應如陝

西浙江例准支月糧舊所給民地五百餘頃仍還之民又言各省州縣官有因錢糧未完被劾者若于離任之先如數輸納請仍留舊任又以兗州濟南東昌青州四府旱災請加賑恤登萊二府歲亦歉收請免本年額賦疏皆下部議行六年擢兩廣總督七年

上遣都統特錦等會勘廣東沿海邊界設兵防守俾民復業有德疏言前此界外遷入內地之民頗苦失業

今聞沿邊設兵許遷戶仍歸舊地莫不踴躍歡呼  
第海濱遼濶若俟勘界既周始議安插尚需時日  
窮民迫不能待請于勘度設兵之時即令州縣官  
按遷戶版籍給還故業俾裕生計得

旨允行是年十一月丁父憂平南王尚可喜以沿海兵民  
賴有德經營安輯疏請留之

命在任守制先是從化增城清遠三水河源新寧等縣因  
蜚戶周玉李榮叛亂總督盧崇峻奏撥藩下及督

提標兵分駐防守賊平後居民以客兵雜處為苦  
八年三月有德疏請撤回分駐各兵歸原標事下  
部議如所請九年正月請回籍治喪

詔允之十年四月編修陳志紀疏言近因亢旱

皇上朝夕求禱憂勤惕勵甘霖雖應民情未暢大小臣工  
少有良知亦當兢兢戒懼用節儉以守官用廉恥  
以持身乃有曾為總督巡撫者猶然繕治峻宇高  
堂連街極巷甚至取地方子女以為倡優晝夜宴

飲其不節儉無廉恥亦已甚矣近在

輦轂之下悍然不守法度無所忌憚如此又何以責  
遠方之為督撫大吏者而求其廉節不渝也疏入

命志紀明指其人志紀覆奏曾為總督之郎廷佐張長庚  
苗澄祖澤溥周有德張朝璘曾為巡撫之許世昌  
莫不用民間賣兒貼婦之錢築愁築怨而有德朝  
璘則方在繕治許世昌取部下婦女教習歌舞且  
當

皇上齋戒禱雨之日演戲如故事下部嚴察郎廷佐張長  
庚苗澄祖澤溥張朝璘皆辯釋許世昌未取所管  
地方婦女曾于齋戒日演戲罰俸一年有德居喪  
營造又于陳志紀覆奏之先浼人囑志紀勿指其  
名草原職追奪

誥命十三年二月起授四川總督時逆藩吳三桂反四川  
叛應之

上命尚書莫洛為經畧駐西安策遣諸軍進征偽將軍吳



之茂與偽總兵彭時亨等糾衆來犯廣元有德偕  
副都統科爾寬分道擊敗賊衆陣斬偽遊擊徐應  
昌等會莫洛將移師征四川

勅有德同巡撫張德地固守朝天廣元諸路經理糧餉偽  
將軍何德成等自昭化赴二郎關謀奪我糧有德  
遣兵擊敗之德成等還據昭化復犯廣元有德偕  
科爾寬等督兵擊敗追逐三十餘里尋以彭時亨  
復屯據七盤朝天諸關刦奪畧陽糧艘廣元缺餉

賊衆窺伺陽平鎮西將軍錫卜臣駐營蟠龍山為賊所刦復阻截餉運

上命有德檄保寧兵回廣元調廣元兵回漢中固守陽平諸處值陝西提督王輔臣叛于寧羌賊黨分據棧道陷秦州平涼十四年三月定西大將軍貝勒洞鄂率兵征輔臣奏以有德叅贊軍務尋奉

詔同副都統海爾圖運礮往秦州時賊衆據關山有德奏請檄回棧道諸軍協力勦擊

上允所請並令統領諸軍前進六月貝勒洞鄂復秦州關  
山賊亦遁七月有德疏請給還

誥命吏部以非例不准

上特允其請十五年隨大將軍圖海征平涼王輔臣降圖  
海奏令有德還守西安十七年賊將吳之茂等尚  
據秦嶺有德同副都統覺和託往勦擊敗賊衆偽  
遊擊王世祜等降是年部議前此運餉廣元遲誤  
罪革有德叅贊任十八年二月調隨湖廣大軍進

征授雲貴總督十月陝西大軍恢復漢中

上諭部曰前者大兵進勦四川已破朝天等關直至保寧恢復在邇因周有德張德地錫卜臣駐廣元不將糧餉極力轉送軍前陝西總督巡撫亦不將糧餉運送以至大兵難於久駐遂爾退回此數年以來使逆賊逋誅封疆未復兵民苦累休養無期皆周有德張德地錫卜臣陝西總督巡撫怠玩遲延之故今大兵前抵蜀疆如督撫諸臣有誤饋運俱以軍法從事決不姑恕十二月議

政王大臣以湖廣大軍進征雲貴其各省調撥及湖廣全省綠旗兵宜令一人統轄以湖廣總督蔡毓榮及有德列奏

敕蔡毓榮為綏遠將軍有德與江西總督董衛國俱聽節制有德尋疾作留駐常德十九年正月卒

陳啓泰

陳啓泰遼東蓋州衛人隸鑲紅旗漢軍順治四年由貢生任直隸滑縣知縣九年擢廣東道監察御

史疏言滿洲部院各官遇父母喪離任守制以廣孝治部議從之十一年授蘇松糧道康熙三年調福建漳南道八年轉巡海道十三年三月逆藩耿精忠據福州叛傳偽檄至漳州啟泰與海澄公黃梧密謀拒守會梧疾篤為賊誘降者接踵精忠復結海賊助逆啟泰度事不可支令其妻劉氏及妾婢幼女二十一人先就縊僚屬畢至啟泰慷慨陳義各慰遣之遂朝服再拜自經死十五年大兵入

閩耿精忠降福建巡撫楊熙疏述啟泰誓死守城  
因四顧無援率妻妾從容就義忠節萃於一門請  
賜贈卹部議贈啟泰光祿寺卿廕一子入監

命從優再議於是贈通政司通政使

賜祭葬如例妻劉氏

予誥贈並致祭初啟泰之在漳州也其子汝器未隨任及  
聞遇害赴漳迎櫬值海賊鄭錦遣其黨入犯劫之  
去越二年乘間脫歸事

聞

上以其父子忠義加贈啟泰工部侍郎授汝罷通政使司  
右通政二十年正月

上御乾清宮賜宴以汝罷及馬雄鎮子光祿寺卿世濟皆  
全家殉難之遺嗣

特命至

御座前

賜之酒三十三年予啟泰謚曰忠毅翰林院撰擬碑文入



奏

上諭大學士曰陳啟泰殉難與他人不同視其闔家之人各自盡畢然後自縊而死甚屬慘傷海賊進城見其家棺櫬如許亦為垂淚其子陳汝器為海賊掠去逾久乃還觀此碑文詞意尚未詳盡令改撰三十四年福建巡撫卞永譽以士民請建專祠於福州入奏

御書忠義流芳以額其祠時汝器擢至刑部侍郎尋任安徽巡撫

世宗憲皇帝時以啟泰入祀昭忠祠乾隆十七年

上念啟泰為國効忠前此未有世職

特予恩騎尉世襲罔替以其孫陳履坦襲

王登聯

王登聯漢軍鑲紅旗人順治六年由貢生授河南

鄭州知州八年巡撫吳景道奉

詔考核府州縣官疏薦登聯有德有才遂擢山東濟南道

十三年內陞通政使叅議十五年遷順天府丞十

七年二月遷大理寺卿九月授保定巡撫十二月  
疏言近日盜案多而緝獲者少不立嚴法恐有諱  
盜不報之弊其降革戴罪督緝者又恐有真盜未  
獲朦朧開復之事嗣後失事不報之州縣當立行  
挈問治以縱盜之罪道府捕廳治以徇庇之罪使  
知申報者雖降革猶可望開復匿報者不能脫罪  
且累及上官則無敢諱隱矣其獲盜也或係自挈  
或係協拿務必真盜淨盡方可銷結如以他案從

犯充數借殺死搪塞者日後真盜犯事前局敗露雖經陞遷仍行追究使知開復之不可徼倖則必拏真盜自贖矣欲弭盜必嚴究窩主窩主慮及敗露每不令在本地行劫故所在官司明知其為巢穴而不問嗣後問擬強盜務究窩家其州縣衛所與諱盜者一體處分若隣里出首番捕訪獲以所起贓私一半給賞如窩主能悛改前惡擒大盜出首者免罪文武職官寔力訪緝者分別紀錄庶蒞

待靖而境域寧也疏上得

旨所奏於弭盜有裨下部詳議俱議行十八年

聖祖仁皇帝御極裁順天巡撫以登聯兼理其事加工部  
尚書銜康熙四年河間大名所屬州縣歉收登聯  
先後奏請發粟賑濟並從之五年十月輔政大臣  
鰲拜以鑲黃旗地畝瘠薄傳

旨圈換正白旗地畝及開墾成熟民地令戶部尚書蘇納  
海會同總督朱昌祚與登聯經理其事登聯分勘

京東諸路因疏言圈換田地正值大小二麥墾種之時臣同部臣東往豐潤灤州諸處荒涼極目民地之待圈者寸壤未耕旗地之待換者半犂未下恐明歲春夏青黃不接無從得食此旗人與百姓並困之情形也臣同各旗副都統至玉田縣相度甫施一圈而旗下官丁咸謂此非山岡石磧即沙淤鹺鹵不肯承受又有舊圈內房屋多而今圈內房屋少者有此地內房屋可居而彼地內房屋破

壞者一經移換則舍舊謀新薪糧必多耗費器具  
亦有損傷此旗下官丁相持不決之情形也至百  
姓情形更有難于見聞者自圈地之令一傳知舊  
業難守有米糧者已糶賣矣無積蓄者將轉徙矣  
婦子老幼環泣馬前云普天之下莫非

王土圈丈分所宜然但撥補不知何處目前霜雪載途  
懼填溝壑將往奔他境而逃人令嚴誰容棲止仍  
就集本土而人稠地窄難以賃居又有謂丁地相

依地去而丁不除賦免而徭尚在餬口無資必虧  
課額者臣往來玉田豐潤遞呈士民不下千百又  
謂自順治三四年兩次大圈地土雖撥城關集鎮  
奉

旨悉留今若概行圈房必致星散若

皇差

陵工運石載料誰為填築搭橋修路挽拽之夫朝貢使臣  
誰任奔走供應之事所關似亦非小夫循制易地



非臣所敢臆測但目擊情形不敢壅於

上聞乞

勅部臣從長酌議俾兩旗各安舊業畿東億萬姓俱免播  
遷幸甚疏入與蘇納海朱昌祚請停園各疏並忤  
鰲拜意革職逮問鰲拜矯

旨並予立絞八年鰲拜獲罪逮繫

詔雪其誣互詳蘇納海朱昌祚傳登聯復原官

賜祭塋如典禮謚愍愍祀直隸名宦祠子盛唐以廕入監

讀書授督捕理事官

欽定八旗通志卷二百三

欽定四庫全書

欽定八旗通志卷二百四

人物志八十四

大臣傳七十

漢軍鑲紅旗二  
馬雄鎮 姚啟聖

侯襲爵  
于成龍

楊茂勳

侯襲爵

侯襲爵漢軍鑲紅旗人順治六年七月管佐領八年閏二月授刑部理事官十年十二月擢廣東肇慶總兵官十二年正月總督李率泰以襲爵青年

勇敢約兵愛民疏請移駐德慶州要地兼轄羅定  
東安西寧三州縣十三年六月襲爵疏言鎮標左  
右兩營馬步兵原備征勦之用刀鎗弓箭皆各營  
自備日久腐朽且所轄羅定東安西寧等州縣并  
肇慶城守水師營兵馬俱缺盔甲器械粵中山寇  
海氛不時竊發請一律製造以裨戰守又言向來  
各城守將備與有司官往往因小嫌互訐激成事  
端請

勅下撫按嚴加申飭並得

旨允行九月遣守備蔡忠光會勦懷集縣克松岡寨生擒  
八人招撫其崇陽王朱蘊鈴及渠帥李盛功等十  
一月羅定州賊羅成基與其黨蕭鼎李仲倫等據  
州屬之雲致峒襲爵率標兵三千抵其巢連破三  
柵五寨成基創斃擒其偽中軍賴洪恩等鼎仲倫  
相繼就撫餘黨悉平十二月因病解任康熙四年  
七月補京口左路水師總兵官十六年十二月調

廣東高雷總兵官十七年四月擢廣東提督七月  
海逆鄭錦犯泉州

上命靖南王耿精忠督餉侍郎達都等自潮州率兵赴閩  
解泉州圍襲爵與副都統尚之璋總兵馬三奇固  
守潮州十月疏言潮州密邇閩疆逼臨大海自經  
變亂水師船隻燬失兼以達濠南澳井洲諸島逆  
賊停泊為巢與潮陽等處相隔帶水窺伺已非一  
日邇來寇犯福泉各島勾連耽耽思逞潮屬營汛

多環山枕海道路寥濶鎮標額設兩營除派防要汛外在城兵僅三百餘名汎險兵單請復設潮州鎮標中營官兵五百大埔營官兵六百潮州水師總兵一員左右二營官兵二千以資彈壓

上允其請十二月海賊百餘艘突犯潮州之鋪前礮臺襲爵遣遊擊秦可京等水陸夾攻陣斬偽叅將都司等五人賊級二百生擒三十四燬賊船二十十八年二月海賊楊金目等犯山頭仔海岸襲爵遣副

將蔡茂植迎擊斬級千餘燬賊船三十賊奔潰茂  
植躍舟逼攻斬偽翼將賴武楊雄及賊黨三百餘  
生擒偽副將郭鳳杜開等九月疏報井洲島逆恃  
海為險臣與鎮臣馬三奇議水陸夾勦秦可京等  
由東路登井洲海岸分兵直衝賊寨破賊城二斬  
級五百餘焚賊巢七蔡茂植等率水師由西路抵  
井洲海面賊截港拒戰官兵奮擊沉賊船十二陣  
斬偽副將李棟林雄偽叅將周武斬級五百餘乘



勝登岸連燬賊營九賊敗遁適南澳海山等賊擁  
衆來援遂與秦可京等合師截殺焚賊船十四溺  
死者甚衆餘賊悉遁十月疏言臣標官兵原設馬  
二步八康熙十四年改為馬一步九粵省幅輿遼  
濶枕臨西粵密邇閩漳標兵有援勦四應之責况  
值海逆流寇互相出没分頭策應非藉馬力曷克  
星馳撲勦請照督標例復為馬二步八俟事平日  
議減下部議行時平南將軍賚塔奏調廣東潮州

碣石兩鎮舟師會勦海逆恢取廈門已得請十二  
月襲爵疏言舟師會勦廈門其不便有四閩省大  
船三百餘配兵三萬餘以當一路潮碣兩鎮額船  
共止舳舨趕冒十五可以出洋其餘皆係舢舨每  
船僅可配兵二十餘名均非駕駛大洋之船水軍  
又係新募未經操演何能獨當一路船小兵單勢  
難遠出閩海一也閩粵東西相距風信不同非比  
陸路可計日會合倘風濤阻滯彼此懸隔難以訂

期夾勦二也且達濠南澳諸逆密邇潮疆時竊窺伺門庭之寇未盡根株難以遠出會勦三也即如達濠諸逆可期一鼓蕩平而沿海逆賊尚有謝昌李積鳳等狂逞於廣肇高雷諸處連踪飄忽與鄭逆聲氣聯絡倘乘虛突犯何憑堵禦難保必無他虞四也但今奉有

成命除已咨催兩鎮整理船兵外臣目睹形勢若不據實披陳恐致貽誤得

旨侯襲爵既言潮碣戰船難以出洋汎守尚患不足宜停其調發可仍撥舟師作進攻狀以分賊勢十九年四月疏報將軍賚塔統兵駐潮與臣會商進剿達濠海寇分撥滿漢官兵前至馬窖夾擊臣與賚塔親臨海口水陸齊進徑奔達濠海面賊首江欽邱輝等率船百餘出磊石門拒敵我舟師奮勇直前礮石如雨賊死命拒戰我陸路兵自後山衝下夾擊左右翼滿漢官兵飛馳接應擊敗逆賊沉賊船八奪

賊船五生擒偽宣尉使洪磊及賊徒三十二名陣斬偽副將二賊勢披靡我兵奪取磊石門賊復糾船二百餘拒敵我兵轉戰愈力賊且戰且退將至馬窖海面水師總兵劉顯芳督兵放礮夾攻又擊沉賊船五淹死賊徒甚衆奪賊船三并器械等物餘賊遁出外洋救獲難民一千三百餘名五月疏報達濠既平南澳遊魂膽落臣與副都統張夢吉總兵劉顯芳領各標官兵水陸並進直抵南澳島

口偽將軍李榮等賊艘六十餘自深澳出蜂擁迎敵我兵鼓勇直前矢石交下遊擊周琬身先士卒斬偽副將一奪賊船官兵前後夾擊又斬偽副將二翼將一逆徒五百餘奪船四賊衆燒死及落水者無數追擊至海山口餘賊四散我兵回搗山巢拆毀礮臺三焚賊巢五計屋二千七百餘間積寇巢穴掃除淨盡並得

旨嘉獎二十一年十二月調貴州提督先是滇黔底定廷

議裁兵雲貴總督蔡毓榮以恢復未久請俟三年  
後裁汰並大定鎮缺兵急需募補兩疏皆經部駁  
至是龔爵疏言裁兵之議已久但貴州東粵西蜀  
南滇北楚為四省咽喉且在萬山中苗蠻繁多性  
嗜刦殺又向被吳逆佔據今恢復未久人懷疑懼  
非重兵不足彈壓計通省經制兵二萬六千有奇  
防隘護糧各營每以汎廣兵單告今留兵二萬外  
裁兵六千六百有餘併家口不下萬人一旦驟減

兵非土著無家可歸兼之旱災頻仍資生乏策勢必相聚為匪乞將各鎮應裁之兵酌撥撫標及大定鎮充補缺額無容另募其餘俟三年後照數裁完下部議從之二十七年十二月卒於官年六十有三子居廣由廕生官山東布政使

楊茂勲

楊茂勲漢軍鑲紅旗人父麒祥仕至鑲白旗都統順治七年選通滿漢文藝者茂勲以廕生應選授



太僕寺副理事官十三年調兵部督捕右理事官  
明年遷吏部右侍郎十六年五月給事中楊雍建  
胡爾愷等疏糾吏部擬選擬陞先後互異下都察  
院察議削銜降革有差茂勲降二級留任十二月  
署河道總督十七年六月授湖廣巡撫十八年

聖祖仁皇帝御極擢貴州總督康熙元年十一月疏言金  
筑土司王應兆以偽晉王李定國招兵為名煽誘  
遠近苗寨抗欠官糧合謀叛逆當亟勦除以示懲

創十二月遣副將冶秉忠領兵由廣順州進勦應  
兆聚衆三千餘出拒敗潰退據紅巖石寨秉忠與  
遊擊白成功席登雲分兵攀陟山箐冒矢石攻破  
賊寨斬應兆并賊黨數百人其餘衆及定番都勻  
各苗寨悉自訴為賊迫脇悔罪乞宥願納糧應役  
二年正月茂勲奏捷下部叙功加兵部尚書銜四  
年六月疏言苗蠻罔識禮義以睚眦相讐殺故黔  
記有曰苗家讐九世休又曰土苗連和國家之害

土苗讐殺國家之利蓋言以苗弱苗也治之之道  
與中土異凡有嘯聚刦殺自當發兵勦除其餘匿  
山箐中自相讐害者第令頭目分辯曲直或願抵  
命或願賠償處置得宜俾咸帖服創懲既立亦必  
悔悟自新漸革舊習此坐安邊境之策也下部議  
行尋以裁缺

召還五年授河道總督七年三月疏言昨歲河決烟墩大  
溜南徙河身淤成平陸計二十里臣相度形勢先

挑引河分刷水勢然後下埽堵塞決口今已全河  
歸道舟楫遄行疏入得

旨據奏黃河烟墩決口閉塞黃淮歸正重運無誤深慰朕  
懷楊茂勲赴工督率速竣龜勉可嘉下部議叙加太子  
少保五月疏言黃河南徙由東安入海元明以來  
藉為運道沙水沸騰常苦淤決每年伏秋於危險  
處集夫搶掾名曰歲修此外近河則築縷隄稍近  
則築月隄稍遠又築遙隄附郭則築護城隄猶恐

水勢暴橫又築格隄及減水石壩以洩水勢前人  
良法具載紀志今沿河隄壩年久圯壞十不存一  
請於農隙責成沿河州縣量雇民夫按隄修築庶  
免臨事張皇又清口為淮黃交會之所近因黃水  
盛漲越淮二十餘里清淮返退洪澤湖內河沙逆  
上倒灌運河必於天妃閘外添築長壩逼黃東行  
引全淮之水出清口淮黃相抵沙逐水流歸海自  
順又董口既被黃河倒灌似難復舊稍右為駱馬

湖向因內無緯道置之今若築長隄於湖內則重運無阻而黃漲稍遠亦弗患直灌停淤矣疏下工部皆議行惟駱馬湖隄以工險費繁寢其事八月河決桃源黃家嘴

諭令確勘估築八年二月工成以病乞休仍

命供職六月副都御史馬紹曾疏言自黃家嘴衝決漕運稽遲

特命遣官相視雖經修築而勞民傷財為累滋大皆楊茂

勲不職所致豈可藉口天行況其自陳積病至云  
手足痿痺總河奔走河干必需精明強幹豈可令  
此病軀優游廢事是月巡鹽御史李棠亦言臣三  
月間經歷河壩聞河臣楊茂勲怨聲載道

皇上歲發帑金數十萬而一夫一柳仍派民間縱有發價  
之名究竟十不得一又德州以北河水淺涸輕舟  
尚不能行糧運必致遲滯乞罷斥茂勲更易幹員  
庶於河務有益並

命茂勲明白回奏尋奏言歲修工程估計發價俱遵定例  
從未私派累民下部免議九月

詔甄別督撫大臣吏部列茂勲名以有疾上

命茂勲原品致仕十四年四月察哈爾布爾尼叛

勅信郡王鄂扎等率師討之授茂勲都統銜率漢軍隨征

七月凱旋十五年五月王大臣請復設鄖陽撫治

防禦賊寇

上命茂勲任之時叛鎮譚洪等糾賊三千以巨艦據琵琶



灘背山負險進逼鄖陽阻絕餉道茂勲與鎮安將  
軍噶爾漢副都統李林隆等議分兵兩道由江南  
北岸並進而以小舟運紅衣礮潛伏江汊擊毀賊  
船其屯據山麓賊衆陸路兵擊之敗潰追勦至均  
州斬偽總兵三擒偽副將二獲賊艦及甲馬甚多  
餉道復通十七年二月與提督佟國瑤會兵進勦  
叛鎮楊來嘉於房縣來嘉及其黨謝泗等擁衆萬  
餘列陣以拒我兵三路並進屢敗之復房縣追躡

至香耳山斬馘及墮崖死者無算復保康縣十八  
年四月擢四川總督仍駐鄖陽疏言均房鎮額兵  
四千其餉米向由安陸鄖陽德安襄陽四府協濟  
而道路險阻運費浩繁莫若折價給兵較市價量  
為昂貴則米販雲集不煩民力而兵食可足又八  
旗勁旅衝鋒破敵所向無前惟山澗陡絕之處弓  
馬難施請多用綠旗步兵俾之攀藤附葛為大兵  
前驅不難直搗賊穴部議如所請行十一月

諭責茂勲懦怯退縮不即規復四川十九年正月偕提督  
徐治都率師至巫山偽將軍王鳳岐等以萬餘衆  
負險自固我師奮勇奪隘大敗賊衆生擒鳳岐斬  
賊三千餘級復巫山復分兵復大昌大寧乘勝取  
夔州譚洪率衆降八月偽將軍胡國柱等陷納溪  
瀘州譚洪等復叛夔州震動

上以茂勲及領兵將軍提鎮等防禦疏忽

飭令分途進剿十一月

允兵部尚書宋德宜奏以陝西轉餉入蜀宜歸一人統理  
命哈占為川陝總督茂勲管四川提督事隨大軍進征雲

南平還京三十二年卒

馬雄鎮

馬雄鎮漢軍鑲紅旗人總督鳴珮子也順治十三  
年由廕生授工部副理事官累遷宗人府啟心郎  
都察院左僉都御史國史院學士康熙八年授山  
西巡撫未之任改廣西巡撫時左江奸民楊其清

等妖言煽衆謀不軌右江妖僧假明宗室為亂羣盜莫扶化等結僮蠻掠梧州平樂二府雄鎮悉討平之疏請定邊俸陞遷之例除兵糧運費之徵皆得

旨允行十二年逆藩吳三桂反明年二月廣西駐防將軍孫延齡叛應之殺都統王永年等劫巡撫解署時巡撫無標兵雄鎮督家人拒戰移檄梧州趣提督馬雄率兵赴援雄遷延不至而延齡脅降甚急雄

鎮自經為家人救免即以蠟丸馳疏請兵延齡訶  
知繁雄鎮及家屬四十餘人於別室絕食數日不  
死吳三桂遣使招之雄鎮麾其使誓不屈先是慶  
陽知府傅宏烈以豫發吳三桂逆謀坐誣謫戍蒼  
梧至是勸延齡反正延齡躊躇未決雄鎮遣其子  
世濟世永孫國楨先後由間道歸京師復疏言廣  
西人心不甘從逆若大軍速至可圖恢復廣西既  
復則三桂腹背受敵矣十六年十月三桂遣從孫

世琮殺延齡擁雄鎮至賊壘誘降雄鎮大呼曰吾奉

命巡撫廣西義守封疆恨不能斬汝首以報

國今討賊不遂死吾分也賊戕其幼子世洪世泰以  
懼之雄鎮罵益厲遂遇害從者馬雲臯唐進寶等  
九人咸引頸受刃時雄鎮年四十有四妻李氏妾  
顧氏劉氏女二及世濟妻董氏妾苗氏同日自經  
死幕客孫成陳文煥乘間脫走由平樂達蒼梧以

雄鎮所著擊笏樓遺稿及彙草辨疑歸之世濟明  
年傳宏烈為廣西巡撫疏述其事

聖祖仁皇帝嘉雄鎮忠烈下所司議卹方雄鎮之遣世濟  
行也全州人易友亮實導之出及世永國楨之行  
年俱幼賊伺之甚密友亮復與州人唐守道唐正  
發謀穴垣出之雄鎮既遇害友亮收其骸骨藁葬  
焉至是世濟

恩授大理寺少卿易友亮唐守道唐正發授遊擊守脩孫



成陳文煥授同知知縣有差十八年世濟請赴廣西取父骸骨得

旨馬雄鎮當逆賊叛亂之時克篤忠貞捐軀殉難其骸骨令馬世濟馳驛往取明年雄鎮喪至京師

贈太子太保兵部尚書

賜祭葬如典禮謚文毅廕一子入監李氏董氏各以夫品級

予誥贈又

允廣西巡撫郝浴請建雙忠祠於桂林祀雄鎮及後為逆  
孽吳世璠所害之巡撫傅宏烈二十一年正月宴  
羣臣於

乾清宮以世濟為殉難撫臣子

特命至

御座前

賜酒時世濟官光祿寺卿旋擢副都御史累遷吏部侍郎

貴州巡撫漕運總督

世宗憲皇帝時以雄鎮入祀昭忠祠乾隆十六年

上念雄鎮為國効忠前此未有世職

特予恩騎尉世襲罔替以其四世孫陞基襲

姚啟聖子儀

姚啟聖浙江會稽人順治十六年附族人籍隸鑲

紅旗漢軍由康熙二年舉人授廣東香山知縣八

年以擅開海禁罷任十三年逆藩耿精忠據福建

叛遣賊衆陷浙江温州府城及台處二府屬縣

聖祖仁皇帝命康親王傑書統師進討啟聖捐資募兵赴  
軍前効力委署諸暨縣同守脩何清勦平紫瑯山  
土賊十四年正月康親王疏陳啟聖勞績得

旨授浙江溫處道隨都統拉哈達勦平松陽宣平二縣十  
五年八月同副都統沃申總兵陳世凱等勦賊石  
塘焚其木城斬獲甚衆乘勝復雲和縣十月康親  
王進征福建耿精忠降尋以啟聖為福建布政使  
時海賊鄭錦據漳泉興化大軍進勦啟聖籌備甲

胄弓矢及戰馬以供軍用十七年五月總督卽廷  
佐奏啟聖自攜兵千餘令其子姚儀統領隨大軍  
勦賊屢著捷功其贍兵購馬製械先後用銀五萬  
餘兩皆出己貲得

旨嘉獎尋擢福建總督值賊陷海澄長泰同安惠安平和  
等縣啟聖條上十疏一請調福寧鎮兵會同八旗  
兵及浙江提標兵勦賊泉州調衢州贛州潮州三  
路兵勦賊漳州一酌給投誠官兵俸餉以安反側

一願自捐糧米增募督標兵五千一薦舉浙江賢  
能文武官二十員請令赴閩調遣一增價糴穀一  
萬石米五千石貯脩軍食一分兵防守要路設站  
運餉一請復設漳浦同安兩鎮總兵官一閩省經  
制兵舊有五萬一千七百餘名請增設一萬八百  
名俟賊平裁撤一嚴禁管兵官以廝役冒佔兵額  
一申明臨陣勝敗賞罰格以振軍心疏下議政王  
大臣等詳議惟衢贛潮三路兵皆在要地未便調

閩又既增督標兵毋庸再廣通省經制額餘並如  
所請行七月啟聖同海澄公黃芳泰遣兵由永福  
進復平和及漳平二縣九月賊帥劉國軒等犯漳  
州啟聖同將軍賚塔都統沃申等率兵進勦大破  
賊於蜈蚣山復長泰縣叙功晉正一品九月遣其  
子儀率兵抵同安賊棄城遁追斬偽副將林欽等  
十月啟聖同副都統吉勒塔布提督楊捷等敗劉  
國軒於江東橋又敗之於潮溝十八年正月劉國

軒糾黨吳淑何佑等據郭塘歐溪頭欲斷江東橋以犯長泰啟聖同賚塔楊捷及巡撫吳興祚遣兵邀擊大破之先後招降偽官四百餘員賊兵一萬四千餘名五月劉國軒吳淑等率賊萬餘謀奪江東橋榴山寨啟聖同賚塔石調聲擊敗之至太平橋潮溝殺賊千餘十九年二月同賚塔楊捷石調聲督兵攻復海澄縣時提督萬正色先克海壇啟聖同賚塔及總兵趙得壽黃大來等分兵七路並



進破賊十九寨又別遣將弁乘潮渡海克取金門  
廈門招降偽將軍朱天貴楊彪等是年叙恢復長  
泰等縣功晉兵部尚書太子太保二十年四月左  
都御史徐元文疏劾之曰啟聖自為香山知縣穢  
蹟彰聞革職提問永不叙用祇以逆孽變亂了身  
戎行遂冒軍功驟致節鉞正當殫力竭忠以報

恩遇不謂素性乖張舉措輕妄以虛詞為實事以乾沒為  
己貲其言欺罔無據其心險側不平臣請畧舉數

端有大可駭者大臣官員侵佔民利煌煌嚴禁而  
啟聖前者妄請借司庫銀十二萬兩經營取利可  
駭者一啟聖自陳疏稱家無片瓦而以臣所聞啟  
聖揮霍金錢不異泥沙題報軍前捐銀十五萬兩  
有奇此銀不從天降地出謂非剋軍餉腴民膏臣  
不信也可駭者二閩省民困已極啟聖不能加意  
存撫乃拆毀民居築園亭水閣日役千人舞女歌  
兒充牣房闈又強娶長泰縣鄉紳戴璣孫女為妾

委其兄戴法署教官物議沸騰可駭者三海壇進  
師啟聖力為阻撓一則曰不敢輕舉喪師辱國一  
則曰不敢以封疆為兒戲及恢復海壇繼取金門  
廈門又言當直取臺灣其始則欲養寇其繼又欲  
窮兵可駭者四啟聖有卒數萬與海壇萬餘之賊  
相持三載不能成功乃欲令水師提督統新降之  
衆遠涉波濤以圖萬一之僥倖繼因詞窮理屈即  
自請出師漫無布置始為是語以塞人言可駭者

五吳興祚萬正色平海奏功啟聖心懷慚妬跪向  
侍郎溫岱云正色密遣人與偽都督朱天貴約定  
投誠隨讓海壇而去其言尤為不根海壇賊遁之  
後朱天貴尚爾狂逞啟聖疏云廈門雖恢復而朱  
天貴實為後患則所云讓去者顯係妄造臣不知  
啟聖何心與驅除海逆者作難如此可駭者六總  
督封疆大吏乃因欲行讒譖長跪部臣之前失大  
臣體可駭者七兵部據啟聖之言以為興祚等冒

濫軍功賴

皇上聖明洞見萬里令即行議叙自此勞臣吐氣人心莫不鼓舞克海賊者既有功則妬功者自應有罪總之啟聖恣睢放誕險詐欺誣委以巖疆甚非八閩蒼生之福乞

勅部確察嚴議以為人臣譎詐行私者戒疏入

命啟聖回奏尋奏言臣於康熙十七年十月進兵至鳳皇山因一時投誠者甚多犒賞不繼與撫臣吳興祚

議及外省貿易頗有微息前督臣李率泰經畧臣  
洪承疇曾借帑為之遂冒昧上疏未蒙

俞允臣等雖因公起見然不應以細事上瀆

宸聰臣自入任京中未有產業而軍前捐銀十五萬有奇  
者香山革職後貿易七年頗積微貲并臣浙江祖  
業變價及親朋借貸經年累月而後有此數臣視  
師漳南於康熙十七年七月巡邊至省見總督衙  
門被耿精忠屯兵居住以致拆毀倒塌臣因捐貲

修整每日所用匠夫不過數十名各給口糧工價  
棚外有員役搭蓋小房令其自行拆去至臣妾數  
人俱有子女年已老大並無歌兒舞女強娶戴璣  
孫女更無其事教官戴法乃前督臣郎廷佐批委  
者臣到任時戴法已署事八月矣康熙十八年十  
一月臣有密陳進勦機宜清字一疏請水陸各分  
五路進兵內稱轉盼來春南風一起船隻難行又  
須坐守一年徒費錢糧臣彼時尚爾踴躍豈至次

年輒肯遲滯且撫臣一經拜疏出師臣即會同將軍楊捷親領官兵進攻烏嶼海倉併十九寨上下夾攻以分賊勢至得廈門之後即攻臺灣臣先於十八年九月有密陳一統規模清字一疏云前得廈門棄而不守亦不再攻臺灣將船隻盡燬以致海賊復起我兵無船可用今托

皇上洪福如得廈門之後即進勦臺灣不難破卵覆巢是臣欲攻臺灣始終如一非既得廈門方請直取臺



灣也又十七年九月臣等大敗海賊於蜈蚣山實  
因兵單不能分取海澄觀音山等處至十月中催  
各路官兵到漳而賊已深溝高壘矣平南將軍臣  
賚塔撫臣吳興祚提臣楊捷及臣等會商若止於  
陸路進兵斷難必勝決須水陸夾攻臣百端籌畫  
不敢輕舉遺誤封疆審有可取之機方敢上疏自  
請督師非姑為是言也侍郎臣溫岱入奏之言臣  
得之朱天貴天貴六月到漳招撫投誠之說天貴

言之而後臣知之總之撫臣提臣拜疏出師則平賊之首功已定臣何所容其慚姑乎溫岱曾云總督提督俱要和衷臣因望

闕跪誓不肯負

恩豈跪部臣乎總之臣任閩三載雖無妬功之心實有溺職之罪伏祈

勅部嚴加議處另簡賢能庶臣心安而臣心白矣疏入

報聞下部知之二十一年二月叙恢復海澄克取金門厦

門功子騎都尉世職加一雲騎尉時鄭錦已死子克塽仍其偽爵稱延平王凡事皆決之劉國軒等遣人齎書願稱臣入貢不難髮登岸如琉球高麗例啟聖以奏

上不許

諭趣水師提督施琅進征二十二年六月施琅擊敗賊衆取澎湖八月啟聖至澎湖經理糧餉是月施琅定臺灣鄭克塽劉國軒等皆降啟聖還福州十一月

卒年六十明年九月部議啟聖修理船隻軍械浮  
冒帑金四萬七千兩有奇應追繳

上以啟聖素著勞績免之長子儀初以捐納知縣從征福  
建康親王以遊擊委用同安之捷啟聖奏其督戰  
有功下部議叙以員外郎用遷郎中應出為知府  
命仍以京官用部議應授五品京堂

上以儀才幹素優且願以武職自効改都督僉事以總兵  
官用二十二年正月授江南狼山鎮總兵官至是

襲職歷杭州沅州鶴麗諸鎮總兵三十四年十月  
擢鑲紅旗漢軍副都統明年卒

賜祭葬如例子法祖襲職

于成龍

于成龍漢軍鑲紅旗人康熙七年由廕生授直隸  
樂亭知縣八年署灤州知州以罪囚脫逃降調樂  
亭民列其善政叩

閹籲留部議保留疊經飭禁械為首者繫獄九年二月縣

民再叩

閣下巡撫金世德察奏所列善政皆實復縣任十三年六月

以緝盜逾限未全獲應降調金世德疏言樂亭

舊號疲邑成龍撫綏調劑與民相宜可否留任部

議不准得

旨于成龍撫綏疲邑與民相宜准其留任十八年擢通州

知州二十一年直隸巡撫于成龍遷兩江總督疏

薦其可大用尋又請

敕廷推清操久著與相類者為江寧知府

上即擢成龍任之二十三年十月

上南巡至江寧傳

諭曰朕在京師聞爾居官廉潔今臨幸此地確加咨訪與所  
聞無異用賜親書手卷以嘉爾清操十一月擢安徽按察使  
駕還京

賜其父原任叅領于得水貂裘獎其教子有方又

諭八旗都統侍郎諸臣有子弟官外者各貽書訓勉效成

龍之潔已愛民二十五年三月擢直隸巡撫瀕行  
賜銀千兩表裏二十端

諭詢畿輔重地利弊應興革者宜何先成龍奏弭盜為先  
奸惡之徒倚仗旗下名色窩藏匪類有司明知而  
莫敢深究嗣後有如此者臣當執法治之既抵任  
疏言弭盜之方在力行保甲今民間已申飭遵行  
惟旗下莊屯向不屬州縣管轄本旗統領官遠在  
京城僅有撥什庫在屯未能約束今應令旗人與



民戶同編保甲以撥什庫與鄉長互相稽察無論盜所刦之家是旗是民俱協力救護能擒獲者給賞如窩盜縱盜許州縣官詰訊申報又疏言燕山六衛所轄遼濶與州縣不相統屬遇有賊盜止責汛弁緝拏而衛員漠不關心此賊盜所以充斥也請嗣後以衛地近州者歸州近縣者歸縣則保甲易編匪類易察京東之通州西之蘆溝橋南之黃村北之沙河宜設捕盜同知四員分駐其地自守

脩以下分汛各官徼巡燉臺諸務及旗下莊屯悉  
歸稽察則武弁有所顧忌旗下亦受約束矣疏並  
下部議行先後察究武清易州等處怙惡不悛之  
旗人請

旨寘諸法又疏言順德廣平大名等府額解狐皮花絨芝  
蔴運送費多恐借端苛派請改解折色又言河工  
歲修派夫應令旗地與民地一體計畝均役下部  
議格於例並得

旨如所請行二十六年四月

上以成龍廉能稱職誠心愛民

特旨嘉獎加太子少保十月

巡行畿甸

賜鞍馬並銀千兩十二月奉

詔同山西巡撫馬齊往鞫湖廣巡撫張汧貪歛得實論罪

如律二十七年三月回任初成龍任安徽按察使

靳輔為河道總督大治淮黃隄壩

上以其未能兼顧下河

敕成龍督理之遇事得自陳奏成龍請濬海口故道靳輔  
請於下河築長隄束水注海

上召詢籍隸淮楊諸臣奏宜從成龍請工部尚書薩穆哈  
奉

命往問居民還奏百姓僉謂濬海口無益大學士九卿議  
未決成龍遷巡撫以侍郎孫在豐督理下河靳輔  
奏開中河以便漕運又請於高家堰外增築重隄

東水北出清口則下河不濬自治

上以疏示成龍成龍奏下河宜濬重隄不宜築開中河無益反為民累

上允靳輔開中河遣尚書佛倫侍郎熊一瀟同總督董訥總漕慕天顏會勘增築重隄事佛倫等還奏宜從靳輔請慕天顏孫在豐御史郭琇相繼劾靳輔興屯累民靳輔亦劾慕天顏孫在豐附和成龍朋謀阻撓至是成龍自湖廣還

召同靳輔入對靳輔言開濬海口有海水倒灌之患成龍  
奏若築高家堰重隄縱上流之水不來而秋霖暴  
漲天長六合等處之水洩歸何處故海口仍應開濬  
上罷靳輔任以福建總督王新命代之別遣部臣代孫在  
豐五月學士開音布侍衛馬武閱中河還奏商賈  
舟行不絕漕運可通又劾慕天顏前次禁止堵塞  
支河勒令已進中河漕船退回有意阻撓

命逮慕天顏鞠問得成龍寄書令勿順從靳輔狀議削成

龍太子少保降二級調用得

旨留巡撫任二十八年正月從

上聞河同侍郎徐廷璽往視下河還奏串場河已興工挑濬自丁溪場至白駒場有通海之處三溜子竈上又有歸入丁溪之馮家壩小河宜加挑濬俾河垛之水由丁溪入苦水洋從之是年畿輔旱

詔發帑金三十萬兩賑濟成龍疏言兵丁仰藉月糧今歲米豆騰貴請加給折色之半又言旗下莊屯貧戶

及未成灾州縣貧民請酌議賑卹又言長蘆鹽引  
前以軍興需餉加增有壅積未銷者請豁免徵課  
並得

旨俞允二十九年正月以部推井陘道甘文煥久不赴任  
奏薦湖廣知府武廷适戴夢熊王輔請

簡補

諭責以收羅別省官員之心破壞定例不准行七月疏請  
增設通州昌平順義及榆林土木各驛馬匹大名



府通判舊二員移一員駐古北口管理驛務移密  
雲縣丞駐石匣腰站並下部議從之是年內陞左  
都御史兼鑲紅旗漢軍都統三十一年二月王新  
命為山東巡撫佛倫所劾罷靳輔仍復任十二月  
靳輔卒成龍任河道總督三十二年五月疏言靳  
輔令河員領帑購買柳束工部駁減銀一萬八千  
兩令覆核並無虛冒又言靳輔興築高家堰重隄  
豫給夫役銀四萬四千餘兩王新命一再題銷工

部以非例飭追實因向來募夫遠方悉給安家路費工完扣抵故無豫給之名此重隄工作中止未經扣抵今訪察豫給是真無從追繳

詔並予豁免三十三年正月奉

召至京疏言運河自通州天津至山東嶧縣卑薄各隄宜加築高厚武清八百戶等處宜增建月隄黃河自滎澤縣至江南碭山縣卑薄各隄均宜加築高堰六壩周橋大壩永安西隄均宜改建石工其毛城

鋪等處舊有引河宜疏濬深通檀度寺東隄及茆  
家園等處挑挖引河即以所挖之土增築兩岸束  
水子隄徐州城石岸急應大修清江浦迤下至黃  
浦東西兩隄寶應至江都東隄高郵西隄俱需加  
築並修葺閘壩涵洞又疏言河防各設專員庶無  
顧此失彼之虞天津道有地方職掌應增設兩道  
一駐河西務一駐滄州分管北自通州南至德州  
河務江南河工錢糧向分廳庫收支不屬淮徐淮

揚西道職掌應增設河庫道桃源同知現駐南岸  
應增北岸同知一邳睢同知宿虹同知現皆駐北  
岸應增南岸通判各一山陽清河舊設同知一應  
增一員分管兩縣毛城鋪閘壩緊要徐屬同知難  
以兼顧應增通判一駐碭山縣又疏言河工所費  
繁多非開捐例不可但銀數太多則無力者裹足  
不前徒有開例之名仍無濟工之實今仿陝西賑  
饑事例酌量增減另行條例庶幾援納者衆工程

得及時興舉

命同九卿科道入

諭詢捐納無累百姓否成龍奏可保無累

上曰前所行捐納事例或因軍需孔急或因拯救災民銀米不能即至其地為一時權宜之計至修理河工錢糧並非難於措處豈可遽行捐納捐納之人豈盡殷實大約稱貸者多不脫削百姓則逋負何由而償且居要津者不給銀而虛冒捐納亦復不少陝西所捐銀兩現今

多有虧空朕從寬未究是皆有司不能擯絕情面囑託所致若不取償於百姓何以補其缺額如此而云無累百姓可乎成龍奏

皇上憂勞百姓屢發帑金百餘萬賑濟陝西且次第蠲免各省錢糧動至數百萬臣愚拙無知因河工費用浩繁請開捐納茲蒙

聖諭切指情弊臣冒昧陳奏之罪奚辭

上曰爾向日議河工事曾面奏減水壩宜塞不宜開今果

可塞乎成龍奏曰臣彼時妄言今亦照斬輔而行

上命大學士以成龍所奏令九卿詳議尚書薩穆哈等議  
河道大修歲修理應陸續題請今以數千里工程  
欲一時盡行興舉因請添設道員同知通判等官  
又條列捐例凡革職年老患病休致之人及布政  
使大員概許捐復俱未協事宜懷私妄奏應革職  
得

旨從寬留任仍興舉緊要各工七月疏言洪澤一湖密近

淮城為淮隄二瀆所匯歸伏秋水發波濤澎湃僅恃高堰土隄雖加築堅固仍須歲修搶修急宜改建石工所有六壩及自小黃莊起至古溝東涵洞止共估工料銀五十萬兩有奇疏下部議從之三十四年八月以督理河務勤勞復原職旋丁父憂回京奏山陽縣龍王閘修造尚遲五空橋及檀度寺應建閘通運高堰石工應開武家墩及楊家廟等壩運料事並下新仕總河董安國即行三十五



年二月

上親征噶爾丹統師由中路進先期以侍郎王國昌督運  
撫遠大將軍費揚古西路軍糧成龍以左都御史  
銜同侍郎李鈞左通政喀拜督運中路軍糧兵丁  
各裹糧八十日八十日外給以成龍所運四月成  
龍詣格德爾庫

御營奏運正項米一萬九千石多齎八千石遵

旨酌留各驛五月丙辰朔

駕次拖稜成龍奏直隸第一運至第六運已過第十五站

格德爾庫地山東省第一運已過第十二站蘓勒

圖地

詔以後運之六七千石留拖稜脩旋師之用癸亥

駕至克魯倫河噶爾丹驚竄

上率前鋒軍追之五日至拖諾山計軍糧日期將滿而成

龍所運未至乃以內大臣馬思喀為平北大將軍

率輕騎畏二十日糧追勦止留扈從

御營兵糧七日戊辰西路軍大破噶爾丹於昭莫多

上旋師至拖稜成龍始至

命留駐散給諸路軍糧六月遵

旨移駐察罕諾爾收貯料圖等處餘糧八月事竣還京九

月

上巡行北塞察視軍情

命成龍偕李納喀拜先赴歸化城督理糧務十月

駕至歸化城

諭曰爾等前此遲悞罪在不赦今許爾等効力自贖成龍  
因與李鈞喀拜王國昌等各自備駝數十以供挽  
運又自備駝馬車輛運呼坦和朔倉米一千五百  
石至喀喇穆倫復助馬塘站十一月

駕過鄂爾多斯之哲固斯臺將

旋蹕

命成龍與李鈞等分駐各站辦事十二月還京三十六年

正月

詔再親征噶爾丹成龍請從征効力

命同王國昌李鈔等先往寧夏督運軍糧奏請以旗員及情願効力人分管押運派鄂爾多斯兵牽馳負載並以理藩院司員隨行

上皆允所請

召問何日起行成龍奏俟効力人員同行

諭戒前者因待衆遲誤毋再瞻顧他人致已獲罪閏三月自寧夏用船起運牽馬馳至第十站白塔接運從

陸

駕過白塔二十五里駐營七日大將軍費揚古偵報噶爾

丹竄死

上旋蹕成龍奉

詔督運三之一赴費揚古軍餘留貯所至各站尋又運回  
諸路餘糧於船站貯用乃還

詔免議遲運前罪仍議叙如部議加四級復

特予騎都尉世職三十七年二月

命以總督銜管直隸巡撫事三月興修永清固安至張協  
七十里舊隄挑濬渾河淤沙十旬竣工

詔錫名永定河建廟以祀奏設南北兩岸分司各一以重  
責成視黃運兩河之例

敕部擇諳練河務之候補候選人員赴工効用七月疏言  
贊皇縣地處重山界連三省久為賊藪近遵

恩諭勸導自新已相率歸誠而防緝不可無兵應設馬兵  
四百以守脩千總各一把總二轄之又言固關舊

設馬步兵七百餘名疊經裁汰抽調止存三之一  
應移王家坪裁存馬兵九十名隸固關叅將增設  
千總把總各一疏下部並從之十一月疏言駐防  
滄州滿洲官兵三百二十六員名歲需粟米七十  
二百八十餘石從前截漕支給近因部議不准截  
漕以本州額徵粟米撥給僅得其半餘皆採買隣  
封市價低昂無定運費贏縮無常每誤二八兩月  
支放之期請自明年仍循舊例截漕支給為便疏



下戶部不准

特旨如所請行是月董安國以不諳河務罷任仍授成龍  
河道總督

諭大學士九卿曰予成龍屢委以事尚克勉効河工須相  
機料理所與敕書可入各部不得掣肘語三十八年三  
月

上巡閱高家堰歸仁隄等處以增築疏濬事宜

諭令籌辦五月疏言黃運兩河舊派徐州屬邑民夫六千

九百餘名助河兵供役率以老弱充數且多逃曠  
請按派夫舊額改令每名徵銀五兩為添設河兵  
月糧又疏言

皇上親視河工

指授方畧大為修治臣以需帑浩繁請許急公人員捐修  
蒙

諭如果修築堅固疏濬深通告成之日自有議叙仰見  
聖心寸功必酬現在應修之處不一若不酌定成例恐効

力人員觀望不前謹條列計丈議叙各款疏並下  
九卿議行九月以疾乞假

命在任調理三十九年三月卒遺疏至得

旨于成龍才品優長服官勤慎屢經簡任實心辦事不辭  
勞瘁宣力有年歷著成效前因患病遣醫前往診視方  
期痊可茲聞溘逝深為軫悼下部優卹

賜祭葬謚曰襄勤子永世襲騎都尉

世宗憲皇帝雍正八年以成龍入賢良祠

